

光緒山西通志

仕實錄七

錄六之七

山西通志第二百五十一

賜進士出身頭品頂戴兵部侍郎兼都察院右副都御史巡撫山西提督軍務臣張齡奉
旨監修

國朝 乾隆

李璋字琳瑯陽曲人乾隆丙辰武進士以守備從軍金川敘
功調任宜章甲戌夏河水漲溢璋晝夜堵禦城賴以全升施
南都司累遷至廣西右江總兵會緬匪不靖備邊雲南著有
勞績卒於官

王績文水人少英敏不羈以騎射隸學官籍忽棄去折節讀
書補郡文學舉辛酉鄉試明年成進士授南部知縣歷宰河
南之寶豐儀封所至著循聲嘗言人當敦大節務實行於根
本處著力蓋晚年於學深有得云

鄭鴻任字子重文水人乙丑進士除休甯令擢知宿州母憂歸服闋值尹文端公總制雲貴以舊屬奏請來南補黔之麻哈州地居苗疆撫治有方獨山民韋文學妖術惑眾陰謀不軌散布偽劄有苗生者首其事於鴻任卽密封白黔撫遂選幹役從苗生入其巢得擒文學按籍捕其黨無一脫者黔撫上其功送部引

見未及行以病卒

鄭岱鍾字東侯文水人由進士授職檢討性豁達遇人不設城府淡於仕進居鄉以恂謹稱庚午重宴鹿鳴

賜國子監司業銜

孫孝愉字德和興縣人文定公子也以父蔭歷官卽署出爲福建糧驛道勘災賑饑遠近被惠調汀漳龍道漳浦民盧茂

作亂討平之敘功加按察使銜管臺灣道事臺灣遠隔重洋上念孝愉母老復留漳州尋授福建按察使孝愉在閩六年既洞悉情僞利弊治洋盜決疑獄威惠並行上下賢之尋調直隸未幾卒

秦爲龍字敬侯清源人由丙子舉人大挑知縣以不耐吏事改教職司訓廣靈邊地樸樸少文聚諸生加意訓迪講論經史以實學相砥礪一時翕然宗之著作頗富家居嘗手訂清源志

孫輝曾字寔甫興縣人丁丑進士授羅山知縣留意文教創闢書院造就甚眾調漢陰尋改澄城澄城近居關陝差務時至吏緣爲奸鄉民苦累輝曾爲設局董以士人由是役均而事辦歲省民錢數千緡

賈廷彥字吉士陽曲人領己卯順天鄉薦選清溪知縣地當蜀徼道通雲貴西藏民戶寥落疲於差役廷彥留心撫字居四年墾闢日廣人獲生聚之樂調繁華陽值金川用兵輓粟飛芻籌畫得宜上下賴之擢知忠州旋升潼川府知府父憂歸服闋起補龍安府卽古陰平道也築江隄以衛城建書院以課士開鴿子崖棧道以通行旅屬邑江油中壩太平二場商賈輻輳爲江水漲衝躬相形勢規復之逾年隄成市場復故人號爲賈公隄擢延建邵道以疾告歸子澄進士官刑部主事

孟潛字孔昭太谷人己卯舉於鄉授東安知縣縣俗健訟號難治潛以爲厚民風必先端士習爲建書院獎進秀良重懲告訐革不便於民者十餘事久之風氣一變縣人作歌傳頌

之未幾告歸性嗜學工書及詩所著有負性草

陳洛書字錫九清源人庚辰進士授臨邑知縣愛士卹商力行保甲盜賊遠屏邑大治超擢南康知府值臨清之變洛書已受代猶協士民爲防守計一方賴以安謐南康故有白鹿洞書院爲考亭講學地葺而新之公暇輒與諸生講授負笈來遊者接踵焉以事獲譴效力南河辦工謹慎久之事白起知陳州府尋告歸

原敬德字仲明榆次人舉壬午鄉試由大挑署資陽知縣補南川有治績薦擢甯海州知州緣事左遷盤屋知縣調署綏德州尋卒爲人精勤幹練風格廉峻而卹士愛民如恐不及尤善治盜甯海爲齊東劇州奸宄易叢事發輒遁迹重洋兵役莫能緝敬德購線躡蹤備知其窩頓所在掩捕無得脫者

沿海肅然當罷官時囊無長物僑居州城州民爭致薪米及卒關中兩邑相向號泣資陽人亦爲位以祀其得人心若此子光鶴鑒儀衛經歷沒於王事蔭恤如例

田永桐字子盛陽曲人癸未武進士由侍衛出爲廣東揭陽遊擊妖婦馬氏倡亂約夜半攻城偵知之東竹韋濱以油置睥睨間賊至同時然之眾驚走乘勢追擊遂潰累遷廣西平樂協副將以母憂歸服闋補河東中營副將五十九年升雲南臨元鎮總兵協勦湖南苗遇賊岑洞破之敘功戴花翎尋擒其渠石天保等嘉慶二年調補蘇松鎮總兵旋改河南南陽鎮教匪蔓延三省帥所部駐襄江北岸歷七年往來援應賊卒不能逸入豫界及賊平而甯陝有裁兵之變馳阨川之西坪鎮賊不得逞尋就撫升江南提督卒

王鍾健字仲乾文水人丙戌進士入翰林歷江西道監察御史禮科掌印給事中性嚴厲直言敢諫權勢無所屈同朝咸敬憚之

吳忠誥字自渭太谷人由拔貢授朝邑知縣精於吏事民以訟至應機立斷咸服其平以最調臨潼歷知綏德州進曹州府知府下車清積案數百興復書院增築河隄疏通趙王河以濟漕運薦擢道員入

覲卒於京邸嘗治河時尙書和琳來勘工故大學士和珅弟也嘉其勤敏歸以語珅及忠誥入都珅諷令謁己堅謝弗往李植字立堂太谷人己丑進士授高明知縣性剛正不阿御吏頗嚴懲奸蠹無少貸而遇利民事則虛懷諮訪期於必行縣故僻陋每朔望謁廟畢進諸生講授久之人爭向學卒於

官士民立祠祀之

孫菖生興縣舉人性耿介直樸鯁寡強禦無殊視由大挑需次安徽歷署繁昌石埭霍山知縣所在以廉惠稱旋署壽州州衝劇號難治正己率屬力崇教化期年而頌聲大作元日家家書官清民安四字榜諸門大興朱文正公撫皖廉得其治行還朝首薦之時菖生方署廬江未及擢用遽以疾卒

武先振字立山太谷舉人以知縣試用江蘇歷署劇縣並有政聲補阜甯以憂歸嘉慶初起知柏鄉調邢臺川楚用兵累年民困供億先振加意拊循恆捐廉支給事集而民不擾以勞勩卒官

張衍齡徐溝人倜儻有膽略由副榜授兵馬司副指揮擢知無爲州潔已愛民興利除弊循聲卓著終於吉安府知府

岳廷元字紹先清源人戊戌進士授宜良縣知縣遭母憂服闋起署連江補福鼎海賊蔡牽寇擾各郡邑多方捍禦民得宴然引疾歸

溫承惠字景儔太谷人以拔貢授吏部七品小京官歷遷郎中出爲陝西督糧道憂歸服除授延榆綏道嘉慶初教匪蔓延川陝當事者檄令練鄉兵防與漢協官軍援剿以功加按察使銜戴花翎前後破賊安康白河諸縣就遷按察使疏陳平賊策得

旨嘉獎下經略議行進布政司逆首龍紹周張漢潮徐添得等自川北犯添得尤猖獗連戰破之六年賊平回任踰年調河南布政使擢江西巡撫調福建兼署閩浙總督海賊蔡牽擾臺灣承惠馳赴廈門遣軍佐提督李長庚協剿大破之鹿

耳山旋擢直隸總督加太子少保滑縣賊起授參贊大臣督兵往剿未幾而有林清之變以失察革職給五品銜督餉幾輔黃河決以刑部員外郎辦睢州隄工既成復以郎中督築永定河工充戶部寶泉局監督出爲山東按察使坐事遣戍伊犁已而釋還旋授湖北布政使道光元年改戶部郎中明年引疾乞休久之卒承惠以樸誠練達膺

三朝知遇歷中外四十餘年屢躋屢起在陝剿賊五年經略額侯甚倚重之陳臬山左累雪冤獄在河南倡修伊洛渠豫民感其德立祠祀焉

賈光緒字通甫太谷舉人知新樂縣川楚軍興畿南疲於供億光籍請定新章盡革浮費民賴以不困驛馬芻茭輸自和農驛卒恣爲魚肉浮收恆數倍爲懸官稱嚴禁抑勒拒馬河

與梁里民輪修歲易新材令於拆橋時籍其板數爲公用皆
歲省民錢無算以親老乞養歸縣人立碑頌之

溫承志字萃圃太谷人由增貢授工部司務歷遷郎中嘉慶
中擢高州府知府未上調潮州俗獷悍喜械鬪巨猾某煽亂
肆惡守令莫能詰承志至并其黨擒之悉置之法一郡肅然
尋擢惠潮嘉道時海盜麥有金張保郭學顯往來剽劫大爲
行賈居民患官軍累勦不能克勢甚張百文敏公奉

命以總督辦寇承志故文敏督學山右時所取士也素知其
才旣抵任卽奏調承志督糧道與籌勦務事宜承志請改運
鹽由陸嚴禁粟麥及他物出洋寇食匱軍火不繼始大困未
幾學顯乞降張保窮蹙亦請殺他寇自贖與石氏等歸誠乃
隨文敏單舸出虎門慰撫宣

朝廷德威保威泣誓效死有金貞固澗州沙磧間承志議進兵高州禽斬之復偕鎮將入海搜戮各島餘匪二十年通寇遂平文敏疏上其功晉按察使銜並戴花翎入

覲歸道卒

特恩授其子啟熊卽用六部員外郎著有平海紀略

康綸鈞字鳳書興縣人丁未進士洊升郎中兼翰林院編修督學陝甘時漢中興安二府以曾遭兵燹考試久停士子缺望綸鈞按試如例並上居歲科奏請補行又以邊徼諸生艱於購書擇子史及詩賦彙爲約編俾遠近咸資誦習一時翕然頌之轉通政使參議卒著有夢芸詩稿

孫鵬儀字搏九興縣人丁未進士授興平知縣教匪出汲川陝縣當其衝歲祲饑民復思鋌險下車外嚴防守內厯撫字

四境安謐尤長於治獄有無賴某戕其六歲兒投尸井中而誣爲從母所殺鵬儀檢尸得刃傷疑之直入某家果獲血汗衣履一訊而伏以卓異歷遷至鞏昌府知府先後清積案二百餘起多所平反引疾歸就醫長安卒

張恆裕字墅亭徐溝人舉己丑鄉試由教習知建平縣調英山繁昌再與江南鄉試分校廉勤慈惠所至著循聲嘗於建平署後植柳樹十餘株比去樹皆成陰士大夫相歌詠之

溫承弼徐溝人己酉武舉官守備從征大小金川屢立戰功果遷至鄖陽鎮總兵承弼多力精技擊性忠勇每戰輒先登衝鋒陷陣所向無敵在軍時獨出摩賊壘匹馬單刀僅一僕能從一日賊設伏大橋承弼馳至鈎矛絆索齊出躡而顛賴此僕力戰以免僕故鐵工也勇而善走承弼在籍時恩育之

得其死力云

丁湛字秋江交城人舉王子鄉試以知縣分發江西歷署高安龍泉彌官帑清積案以廉幹稱補宜黃縣下車值亢旱申請緩征災民賴之次年黃水氾溢泮沒多人捐施棺木二千餘具旣而鄰邑蛋匪滋事人情洶洶亟捐廉練鄉兵日夜防守境賴以安母憂歸哀毀如禮服闋遂不復出教授生徒以終著有未誠堂稿

牛映奎字聚五清源人甲寅舉於鄉由巢縣知縣累遷潁州府知府清廉耿介所至有政聲令巢時當滑縣亂後有言賊餘黨匿縣山中傳教者大府擬用兵映奎力辨爲妄願以百口保其無他巢民尸祝之家故素封入仕後盡耗其產負債累累有茶商某持萬金爲壽謝絕之宦皖三十餘年所歷州

縣以十數牛青天之稱徧於江淮間云

李培光字素裁太原人領己卯鄉薦以知縣需次於蜀署井研尋調鹽源山賊據險剽掠久爲民患躬率丁壯搗巢掩捕擒其魁戮之鹽井爲富商所據井旁遺瀝聽窮民用商啗官乞嚴禁培光不許而大吏竟飭如商指檄下培光曰吾不能爲貧民作主何以官爲卽日引病歸

周玉隆陽曲人以把總從征伊犁屢立奇勲會官軍屯山上賊悉銳至玉隆大呼陷陣一槍恆貫三四人所向披靡官兵乘之賊大潰有悍賊獨拒戰玉隆卽馬上擒之以歸比至營賊肋已斷矣將軍兆惠見之大喜呼爲巴圖魯擢守備尋晉都司卒所用槍長二丈重三十餘斤鋒六尺凡八稜稜脊皆有刃腰插鐵簡長三尺許戰酣則掣以擊賊當之者無不糜

烟長子某亦以勇聞年二十餘沒於陣

孫鑒字觀我太原人官揚州府經歷改調廣西歷署恭城平南知縣以捕獲亂民平反冤獄再奉

特旨嘉獎其後貴州亂苗突竄西隆鑒方攝泗城知府率練勇星夜馳援連戰皆捷旋以八達被圍委鑒設防舊州未幾八渡失守總兵某倉皇往救全軍俱沒鑒孤駐教場相距十餘里招集遺民多張疑陣賊不敢逼及再至遇大軍遂潰截其歸路斬獲無算自是賊聞其至望風驚竄泗城各屬俱得安堵擢守常德府戢暴除奸課農勸學以勞瘁得疾卒於官郡人祀之

喬玉瑗字孔璧祁縣人以太學生考授州同留河工效力歷遷至狄州知州嘗丞天津所管河隄險工林立應手立辦鹽

商陋規悉卻之其窮民貧販謀升斗利者皆寬其禁一時稱
頌及官西陲以籌辦兵差見重於舒文襄公欲薦之以老辭
因事鐫職遂不復仕子煌官郡丞有黃葉樓詩集

成履恆字立方文水人由部郎出知徽州府郡山多土曠客
民葺棚私墾時隱匿逸犯恣爲奸利大府檄令會營搜捕驅
逐履恆恐倉卒激變因留兵祁門而單騎隨一僕入山曉諭
棚民皆感泣縛犯以獻乃徐曉以利害散歸鄉里調署安慶
被議罷歸家居建宗祠社學義冢鄉里皆欽其風裁

以上太
原府

朱永年字資訓襄陵人乾隆丙辰進士授興平知縣調湯陰
俗不善紡績永年造織具勤指示自是機聲四起尋升祁州
知州以老乞歸家居簡樸絕迹城市教授後進以終

劉組晉字繩遠臨汾人由部郎授陝西鳳翔府知府猶介自

守卓有政績盡革陋規屬員供億悉卻之郡多土棍蠹役德威兼施澆風爲之一變旋調柳州府清操彌勵犵獞胥感德向化勘災象州按戶給賑民霑實惠致仕歸不名一錢民頌之弗衰

宋范勳字炳文臨汾人丁巳進士家居以孝友聞兩宰昌化設義學立書院嘉惠士林民以訟至者立與判決從無株連羈累值荒歉捐俸勸輸減價平糶縣人口祝之

張宗衡字亦平曲沃人己未進士知新化縣調繁湘陰本儒術爲吏治政成民悅新甯令劉樸者與宗衡同舉進士亦有政聲

郝大成字毅齋曲沃人壬戌進士授開泰知縣卽故五開衛也地當黔邊苗民雜處蒞任興利除弊力崇文教以暇修輯

縣志一洗荒陋之習尋卒於官

李允性字惺吾翼城人壬戌進士授興甯知縣緩懷狎民守法無枉調攸縣再與湘閩分校後量移入閩歷宰劇縣所至有聲崇安有老佛會者愚民多爲所惑按治誅其爲首者餘皆保釋令自新歷遷袁州府知府

劉義字我山襄陵人辛未進士知延津縣簡差徭以紓民力築隄防以捍水患民賴之

翟世甯字德輔曲沃人以丁丑舉人選知縣需次粵東嘗署普甯俗刁悍多會匪往往滋事鄉農亦藉土豪爲倚庇逋賦爲常世甯推誠布公時以禍福利害相曉諭積習漸革旋補四會以親老乞養歸

蘇惠民字奉天曲沃舉人官浙之太平令調諸暨多惠政嘗

晉臨安有虎屢傷人爲文驅逐期三日虎果潛迹浙人盛稱之著有湖山寄士集

劉秉恒洪洞人舉壬午順天鄉試由內閣中書歷遷兵部員外郎會征金川以閣臣薦直軍機處簪筆承旨暢曉事宜未嘗有遺略當事倚如左右手母憂歸服除起補原官進戶部郎中出爲知府不就尋卒於京邸

裴振字西鷺曲沃人乙未進士釋褐奉天府教授遷蒙城知縣值歲饑淮南流民相望於道發倉請帑竭力賑濟惠洽一時以最擢知亳州荒廢之後散牛種給籽糧民胥復業歲己酉河決歸德東灌於渦水距州北門僅半里躬率丁壯疏下流武家河以殺水勢田廬被災者爲蠲賦給資勞動甚至以事干吏議罷歸

劉大懿字堅雅洪洞人舉丁酉鄉試由部郎出爲福建糧備道旋調鹽法道革除商餽陋規攝按察使會閩中大獄興院司皆坐簠簋不飭懿獨以廉介著遷臺灣道兼提督學政官弁報獲洋盜多脅從至有羅致平民塞責者大懿悉除之海外鮮能文士爲之口講手畫俾知繩尺拔其尤以相鼓勵由是羣競於學尋以鹽道任內事被議罷準入鍰復官授安肅道以鎮靜爲治邊民懷德藩部畏威以憂歸起復福建按察使泉州鄉宦張某者僕殺人張賄買鄉民代承其罪事發更撫細故持撫軍短長習以息訟大懿卒論張如法時論快之調署山東布政使以註誤左遷刑部員外郎告歸著有格言並詩文集

樊士鑑字夔川臨汾人庚子進士由工部郎中授潁州府知

府課吏撫民廉明稱最暇則肆志吟詠著有偃爐夜課等集
劉光晟字寅賓洪洞人河督勤子也以父蔭補官正定同知
署景州知州會蝗起單騎往視急捐貲募民夫捕斗蝗者易
以粟民踴躍爭先秋成竟不爲災性卓犖有幹略里居時以
購辦洋銅佐晉省鼓鑄獲邀優獎嘗署順天南路同知盡除
差徭積弊市月中清所屬州縣積案累百一時稱爲能在正
定亦多惠政告歸士民懷之

薛廷魁字春元曲沃人庚辰進士授寶雞令有政聲憂歸服
除補海甯捐俸築柴塋建書院待士臨民一以至誠惻惻無
華有循良風

王名捷字翰飛曲沃人癸丑進士除靈寶知縣持躬廉介取
下寬仁歲旱蝗冒暑驅捕大雨滂沱蝗多死遂不爲災調祁

門知縣革陋規修書院頌聲大作未幾卒

亢榛字乃心臨汾人由副貢授安徽鳳臺知縣旋調合肥清慎廉慈蔚有聲稱

劉大懋字慕宗洪洞人以貢授刑部郎中總辦秋讞援經附律無枉無縱出爲四川鹽法道會軍興設局轉運羽書絡繹措施裕如調貴西道所屬苗民雜處俗獷悍屢滋事大懋按部所至就深林密箐開宣慰朝廷德意爲履田畝課農桑勞來董戒民俗爲之一變尋以足疾乞歸居鄉好施予喜造就後學縣中大役若修城繕隄多所經始築溪南別墅徜徉三十餘年卒

劉秉愉字孝徵洪洞人由部郎擢湖南糧道革弊興利催徵轉運弁丁便之尋遷按察使桂陽民侯某以曖昧戕死其兄

有司受賄置不問秉愉廉知將按治大吏某多方袒庇會獄未竟而代者至秉愉卽據情陳奏事下總督提審案定一如秉愉言尋遷湖北按察使荊州巨盜嚴金龍謀變單騎往擒之未踰月事平無辜株連者悉釋之未幾以疾告歸道卒王爾城字子固洪洞人以貢授郟縣知縣到官清積案雪冤獄興修書院營建橋梁百廢並舉與頌盈途大軍經禹州上官廉其能令綜理臺站車馬供應咄嗟而辦民不知兵後以疾乞歸尋卒民祠祀之

張道源字菊坡浮山人由部郎出知南雄府以最調守廣州臺灣安南相繼用兵佐理軍需甚爲當事所倚任澳門民夷雜處英吉利有因忿殺人其酋拒捕者督撫議用兵道源請以理論因輕舟抵澳申明約束開示禍福英酋懾服卽獻凶

出案遂結遷甯紹台道尋佐福文襄公剿平苗匪敘功

賞戴花翎文襄嘗以其遇大事有卓識定力稱之

王勉字時敏太平人官刑部員外郎屢獻疑獄判決精詳奉委沙河平糶矢公矢慎盡除積弊一時稱之

裴衡度字晉賢曲沃人由貢生歷官至四川永甯道御苗獮有恩義所至帖然遷湖南岳常道署按察使潔已愛民人感其惠勒石頌之解組歸卒於家

趙繼唐字元君曲沃人由選拔知益陽縣前令忤上官諷繼唐揭其陰事繼唐歎曰禍人以固寵如此心何卒坐此鐫級處之怡然少孤事兄甚敬喜宋儒書潛心至老不倦

翟長清字朗山曲沃人以通判歷蜀之松潘雜峽二廳同知撫綏番部輯安軍民時捐俸修葺橋道以利行旅遠近惠之

擢知府謁選入都道經里門卒於家

以上平陽府

郭九同字繹及猗氏人庚辰進士任新野令爲政簡易不務赫赫名而實惠所及民皆愛戴以老罷歸里居食貧劬學如爲諸生時開敬交社與後進講授以終

王雲程臨晉人乙未進士授巴縣令下車清積案釋滯獄惟以培養人材寬裕民力爲務循聲卓著少與縣人薛天相齊名而文章爾雅尤爲士林所推

以上蒲州府

暴煜字耀生屯留人辛丑鄉薦官曲江府知府遷湖南長寶道山東都轉運使天性純篤清正不阿致仕後宦橐蕭然至今人猶頌之

范履乾字步天長子人甲子舉於鄉由大挑補隆德知縣邑小差繁獨力擘畫歷三年無隕越歲祲領帑賑濟並捐俸煮

粥以食饑民調永昌減民間車馬之供設書院以興文教上官以學道愛人稱之范學孜其族也由乙酉舉人同知濟甯州攝魚臺縣前後公愼自矢多惠政管內渠道二十九皆通運河年久淤塞官吏勒民佃種倚爲利廉得其弊仍令引泉疏流隙地遍栽榆柳以備修河工料時稱良吏

趙猷字存誠襄垣人辛未進士任定邊知縣戢盜安民折獄明決卓有政績

馮敬典字尹東屯留人舉庚寅鄉試授祿勸知縣權知武定州時鎮雄有巨案以敬典廉明具幹略遂擢牧鎮雄案既結因俗制宜清弊除害吏治一新遷麗江府知府地通西藏民番雜處敬典持以敬信夙夜宣勤邊境乂安尋告歸

卽克謙字六皆長子人由拔貢任大同教諭舉庚寅鄉試旋

成進士授德安知縣縣舊有屯田數百頃爲風沙埋沒民苦課累爲請於上官題豁其賦以卓薦遷知安州遇大水蕩民居懸賞救援發粟賑濟一時全活者甚眾歷署府廳同知所至以幹濟稱攝昌平州卒於官所著有地山詩稿

暴煊字蘊輝屯留人由乾隆己亥舉人官福安知縣學深養遠不尙模稜以直被黜人咸惜之著有偶爾集未梓

牛三剛字維化潞城人領戊申鄉薦嘉慶初以大挑知縣分發四川時川匪方熾或勸改就教職三綱不可曰吾旣受命此身己非已有可擇官而仕乎至蜀深爲當事所器檄戍保甯之木門堡臬司劉授以鄉兵五百俾之訓練嘗扼寇於得勝寨悍賊張二彪來犯力戰破之以功補南部知縣仍留軍協勦以勞瘁卒年四十三少工吟詠著有木門紀事詩弟三

捷字步武少有氣慨重然諾精技擊事兄甚謹隨之入蜀駐
木門日與健兒角逐時出奇擒賊得勝之役與有力焉兄卒
扶其櫬歸崎嶇戎馬備歷艱辛卒賴以濟家居課子姪以老
高拱字端辰潞城人以貢人子供事吏部除密縣典史克勤
其職每策騎徧歷鄉村勸課農桑與父老相慰勞到官迎養
其母母念家甚切不久遂歸拱每食惻然至泣下乃以病乞
休長吏留之不可密人相率走送至境外家居奉親課子以
行義著

劉青蓮壺關人舉丙午順天鄉試授滿城知縣改甯津調繁
清苑以廉幹稱擢順天西路同知林清之變設法勦捕無漏
網及株連者境內肅然艱歸起補東路同知官畿輔二十餘
年劇縣名州多所攝署所在有政績終永定府知府

以上潞安府

冀蘭泰字晚亭平遙人甲寅魁於鄉授韓城知縣調長安擢
定遠廳同知道光中大軍征張格爾奉檄辦邊外糧臺轉饋
萬里部署得宜事平敘功升台州府知府愿署甯波嚴州政
簡風清待屬吏有體而於民事則督課惟勤云

范清洪字星源介休人乾隆乙丑明通官刑曹愿遷至郎中
聽斷明敏大獄悉資以讞決出爲浙江甯紹台道飭法紀絕
苞苴六年不染一塵以疾歸

降仲字景山介休人甲戌明通授齊河知縣值

饑輿臨幸除道供帳不輕累民民借常平倉粟遇歲饑不能
償卽出五百金代輸之卒於官無不涕泣者

張時棟字雲浦介休人丁丑進士除零陵令有惠政膺卓薦
擢知思南府邊民感德親知僚友有不給者均賴其周恤傳

頌不衰

郭元凱介休人癸未武進士以一甲二名及第由侍衛擢臨武營參將隨征金川敘功轉平樂協副將攻達爾圖進克札烏古山梁連奪要隘直抵噶喇依圍其巢穴擒獲賊首身被重創奮勇不少挫金川平進南陽鎮總兵旋調壽春鎮

馬錦襄汾陽人舉乙酉鄉試授樂平知縣地僻且貧明末兵燹後城垣傾圯殆盡錦襄加意拊循建修城議士民賴以安堵同時張贊元亦以舉人任洧川知縣重築城垣大軍剿教匪供億紛繁減科派籌經費民不知擾引疾歸卒

魯習之字學山介休人由選貢充教習除澈浦知縣調繁瀏陽尋遷知靖州擢安順府知府所至政平訟理士民愛戴在安順建立習安書院捐俸以充經費廉明寬厚大著循聲膺

卓薦調貴陽修整育嬰養濟諸院收恤孤貧情釐錢法振作文風治獄尤詳愼不稍阿上官意旨厯護糧儲貴西各道卒宋鼎介休人己丑武進士授侍衛出爲松潘鎮遊擊金川之役與其僕東升衝前鋒賊眾東升死於難鼎單騎獨突出卒率眾破賊升闕浙督標參將林爽文之亂亦著戰績終福州府副將

郭在遠字可之介休人舉辛卯鄉試第一庚子成進士由檢討改禮部主事厯遷吏部郎中出知廉州府粵撫韓稔其能留辦積案以勞瘁卒生平喜獎掖士類有求必爲盡力在部曹厯職勤愼明習掌故才不盡用識者惜之

馬書欣字小眉丁未進士授刑部主事厯員外郎中出爲肇慶府知府進高廉兵備道瀕海命盜案牘紛繁遇事審詳期

無枉縱尋擢河南按察使至則禁餽遺絕請謁凡政所未斷
法所未平必摘理之盡得其情平反甚多兩署藩司弊絕風
清卒於官

雷應暢平遙人由拔貢選趙城訓導舉癸卯鄉試丁未成進
士除冕甯知縣馴服苗夷剔除銅鉛兩廠之弊委辦西藏糧
務就署蒲江擢化州知州減差徭絕苞苴奸宄斂迹善良奮
興以年老乞歸

郭繼儀字錫汾汾陽人由部郎選潼川知府未任大軍征金
川齎餼赴軍前委攝順慶重慶二府總理東路兵差尋改發
陝西署西安府覈隱舉墜持以堅勤撫院吏倚勢豪橫廉得
之置諸法三輔肅然補漢中知府膺卓薦同官某循吏也性
傲上官將抑之繼儀力爭請以己名易乃並列上考因失察

屬縣論罷尋以同知起用歷署榆林知府潼關同知卒子泰成由進士官至戶科給事中

魏世標汾陽人由巴陵丞擢知通道縣蠻獠雜處俗好鬥罔識禮讓世標多方化導請於大吏增學額復捐俸建書院聚諸生課以讀書境內大治引疾歸不名一錢幾至斷炊云

耿毓孝字順之汾陽人以廩貢司訓襄陵薦擢新興知縣調高要母服闋起知北流署全州以亢直忤上官謫戍卒毓孝少負雋才在官雪冤獄緝私梟以明幹稱篤於師友嘗受學於任吏部翔鈞臺宗丞子也鈞臺遺書皆出俸爲校采所自著有手註易詩存於家子鳴陽選貢徐溝教諭有文名

司能任字可亭汾陽人以拔貢授縉雲知縣調嘉興地繁富爲浙東財賦區催科有法吏民相安以暇修輯志乘移宰粵

之歸善嚴緝逋盜修濬海口建鐵索橋夜然燈橋柱以便行人以最擣碣石同知厯佛山澳門終惠州府知府善理繁劇所至有聲

高光祖字寬軒介休人官都勻府理苗同知調署松桃紅苗尤難治勸其力田諭以大義一境肅然尋署南籠府道過安南有貞女被害逸犯久未獲光祖宿驛亭偵得真凶所在立擒之置諸法並請旌其女終於普洱府知府

張崇樸介休人知鉛山縣有循吏之稱改補孟縣得韓文公季子昶墓志知公實爲河陽人求得其裔爲請置五經博士一時士林稱之

侯爵字如天官西城正指揮性鯁直屏絕請託持法不撓奸宄斂迹艱歸家居濟貧恤困爲善若渴尤篤於故舊有指國

解囊之風服闋授員外郎未用而卒

李日融字退谷介休人官大理寺評事恤刑慎獄嘗駁川省擬案或以力難勝爲阻不顧卒如其議時人有廷尉如干將鋒芒不可屈之詠晚年居鄉敦倫睦族樂善推誠鄉里儇薄子多所感化

田錫莘字道耕汾陽人由平涼知縣累遷鳳翔知府值金川軍凱旋供億豐備軍喜而民不擾調守西安卒生平強幹有器識長於綜理性倨而勇於赴義遇同官急難揮千金不吝人多稱之

張書紳字道存汾陽人官廣東同知性廉慎所莅有循聲嘗署大埔龍門知縣抑豪強決疑獄訟平政理人懷其惠龍門前令某忤大府被劾貪不能歸糾同官助之贐因是失當道

歎卒論罷

劉鵬舉字扶青汾陽人生有至性嘗割臂愈父疾官貴州照磨委護寶黔局錢務以廉慎爲大吏所重其後廠事債同人皆以侵利獲重譴鵬舉脫然無累父喪闋改官甘肅逆匪田五之亂分門拒守著有勞績尋以母憂歸

曹沂字魯泉介休人由部郎出爲宜昌府知府嚴絕苞苴剔除蠹役會辦臺灣軍需傾囊資供給閭閻不擾性豪俠施予不吝而推重師儒耽吟詠乞歸後娛情文翰以終

賈世模號介亭介休人湘鄉知縣甫蒞任卽按巨猾王某一縣稱快修東臬書院集英俊親課之愛民勵俗政教大行厯署善化湘潭武陵諸劇邑在武陵值大水環城力排眾議毀營房數十城賴以全金川凱旋供頓不擾閭閻阿文成公與

語甚器之未幾以疾歸

曹培棟字雲浦介休人性明敏篤孝友行義爲鄉黨推重補官西城兵馬司正指揮遇案摘姦發伏應機立斷屢雪奇冤時都市多流丐偶有斃者胥役藉以居奇久爲商賈患力禁之其他積弊剔釐一清嚴絕苞苴無敢干以私者一時翕然以良吏稱之

郭汝衡汾陽人以把總委從平陽總鎮德剿湖北教匪德嘗單騎誘賊令汝衡伏山下約午刻出戰踰時不至亟率眾往迎知德已沒於陣皆不敢進汝衡獨怒呼殺賊奪尸而還一軍義之以功歷定襄千總擢守備卒

王彬字均菴汾陽人好學有膽略乾隆末粵東教匪滋事隨營往剿彬密訪知渠魁所在伏兵擒之並及其黨以功授三

縣知縣累遷至運河道

以上汾州府

張宗孔鳳臺人由舉人授犁川知縣到官值湖水泛溢奉檄督治隄防不數月間工程就緒視前尤完固而所費僅及他人之半上官獎其廉能調署施南府同知去之日士民壺榼相屬於道

郭兆麟字麟伍陽城人博學工詩戊子舉於鄉以大挑授樂亭知縣政聲卓越調密雲衝邊差劇辦裕如會

變輿東巡以事稱

旨賜緞獎焉擢滄州知州梟民時出沒爲盜兆麟寬嚴交濟舊俗更新姦宄滅迹罷歸吟詠自娛著有梅菴詩鈔

延青雲字果廷陽城人官泉州府通判性勤敏遇事敢任海盜歐幅者屢劫商船蹤迹詭密遇捕輒颺去總督某親至郡

坐索遍緝弗得官弁因之獲戾青雲偵知賊處集壯勇乘夜掩其不備生擒之以歸案定擬死卽以所佩刀戮焉同里張晉嘗作歐幅刀歌紀其事以功升廈門同知

以上澤州府

姜居廣字有容大同人父昌宗官新平守備居廣天資穎異好學工書既而以騎射應材官選乾隆丁巳成武進士由守備歷遷甯夏遊擊會西陲用兵奉檄領解駝馬往來哈密闢展地方備悉攻守形勢復充新疆英阿薩爾駐防嚴營伍消糧餉綏輯協宜勞績懋著終於紫荆關參將

李金臺靈邱人由舉人任婺源知縣歷署英山全椒方正不阿操持嚴潔聽斷明決所至興利革弊除暴安良循聲甚著

以上大同府

牛聯魁平魯人總兵射斗子也辛酉進士授光山知縣遷南

陽府同知所至振書院褒節婦公正廉明政績甚著

明平府

張鳴鶯榆社人家貧好學夜則映火讀書舉王子鄉試宰藁城清廉愛民不親阿堵卒於任所行李蕭條

張克睿字聖功榆社人由戊午舉人官至麗江府知府正色率下威惠並行性勤敏明習吏事長於治獄凡積年疑案一訊即清歷攝府廳各篆所至有聲致仕歸麗江人祀之雪山書院並刊石頌之

張廷試字殿揚榆社人官桃源令江灘漁戶排釘竹木截流捕魚行舟多遭撞損且藉藏奸宄廷試揭諸上官檄各屬除之調繁湘潭政蹟丕著以母老乞養歸著有行政錄退食紀略諸書

張暉吉字曜遠榆社人以貢任涿州知州處繁劇之區治理

裕如政聲卓著臨行士庶攀轅者不絕於道

以上遼州

史謙光字豫菴武鄉人乙丑進士除奉新令性明敏精於聽斷而務協情理恒得法外意數決疑獄人欽其能縣故多大族謙光禮遇之而嚴絕請託土豪衙蠹皆屏迹撫軍胡謂其有循吏風將薦之以親老乞歸尋卒

史傳遠字伯猷武鄉人辛巳進士授高陵知縣值歲饑躬親散賑實惠及民署潼關廳復調邵陽會征金川當事以棧道艱於轉輸擇能吏分司其事遂檄傳遠駐沔縣轄南棧三驛夫馬不給佐之以驢咄嗟而辦金川平以卓薦遷知興安州母憂服除復以薦擢知泰安府歲荐饑設粥以食餓者全活至萬人曹州饑民嘯聚將爲亂奉檄查辦民間其至徐解散聽賑無敢譁者尋調守南引疾歸遂不復出年踰八十卒

沁州

趙夢蓮字協占孟縣人少英敏有異才弱冠舉丙辰鄉試筮仕林縣令有孀歸抱兒訴夫兄奪其志者夢蓮曰爾果矢志靡他吾給爾生資婦泣謝乃按月餼之又捐俸設書院經費以惠士林解組歸林人攀留者相屬

竇甯字裕侯平定人丁巳武進士由侍衛擢福建遊擊洋盜出沒波濤奸民悍卒多爲其耳目甯嚴號令申約束恩威並濟海疆靜謐尋以參將追剿漳賊蔡榮祖黨匪任事不避艱險得

旨嘉獎升延平協副將卒於官

劉煜字明軒平定人已未進士知遼安縣調黃岡漢陽歷宜昌同知煜性強毅明習吏事遇豪富陵虐平民輒按治執法

不貸鞠獄多所平反卒於官

張四箴字去非平定人舉甲寅鄉試授建德知縣值歲旱鄉間無賴嘯聚攘奪捕獲其魁立置諸法民以安輯俗狡黠類持官吏短長逋賦爲常四箴力革徵收夙弊設方勸懲用是歲課皆及時完納無踰限者性豪邁善飲嘗蓄異式酒卮十二種號十二杯主人解組時囊橐蕭然至不能辦裝云

劉秉鉞字駿聲平定人舉丁卯鄉試第一明年成進士授武功知縣天資明敏案牘一過洞悉隱微民以訟至剖斷如流職未滿卒於官時論惜之

弓養正字培甫壽陽人由舉人司訓清源丁丑成進士授內黃知縣廉勤有幹略莅職甫卅月以禽獲大盜當遷引

見方歸適遇王倫之變臨清故與縣鄰養正聞信度縣必駐

兵急督書役購買豆草牛隻糗糧皆豫儲以待已而大吏帶兵進剿會於內黃一切軍需無不立辦民皆安堵若不知有兵者遷知信陽州特擢永平府知府正己率屬民孚其惠素剛強與永通道某不相能遂至互揭經部議獲直卒以忤權貴落職家居十餘年卒子佩紱以進士官宜君知縣

賈忻字融亭平定人癸酉拔貢歷宰岢縣及慈溪累遷贛州府知府在官勤慎廉明所至俱有政聲致仕後與修州志

李楷字榮孔孟縣人以拔貢試丞倅借補原武主簿擢知孟縣抵任卽除夫役需索民船陋規頌聲大作方庚辰歲河決陽橋大學士劉文正督工立法頗嚴楷獨以勤慎見賞其越次遷擢劉主之在孟以治行當卓薦有尼之者遂乞休歸劉祁字友奚平定人已卯舉於鄉由教諭擢錦屏知縣天柱

開泰二縣爭茶山久不決奉檄會勘廉得其實天柱令陳某
盛筵邀求左袒祁不可秉公詳報案乃結父喪除起補合浦
歲值荒旱捐廉賑濟減價平糶并設粥廠以拯窮民之無依
者調電白並多治績一時有劉青天之目致仕後家居十餘
年卒

李朝鳴字儀九平定人舉庚辰鄉試由信陽州判授浙川知
縣承辦河工夫料從公給價民亦踴躍勸功用是河屢溢而
無流離之苦修復書院及荆紫關城以疾告歸士民遮道泣
送爲立祠祀焉

宋璜字魯西樂平人庚辰舉於鄉授渭源知縣在官廉能凡
累民差徭率捐俸辦理調山丹所屬峽口鎮係陝甘孔道舊
無井爲浚渠引水便民人稱爲宋公渠遭父喪服除補武鄉

薦升景州知州以母老乞養歸

郝璦字瑞臣孟縣人庚辰進士授崑山令潔已愛民值水災霑體塗足家施戶給士民感歎以養告歸

白久潤孟縣人壬午鄉薦授臨安知縣改甯朔復調兩當歷廿餘年廉隅自飭士民感戴洎解組清風兩襲布衣疏食處之晏如

董凝極字定元樂平人舉辛卯鄉試任禮縣知縣舊例官採鹿茸虎骨久爲民累下車首革之刻石以誌未幾叛回變作守禦有法賊不敢犯州縣搜捕逆黨多藉以要功民間騷然凝極獨無所株連士民感德相與製衣繖以獻卻之不得遂以違禁被議改教職歷永甯學正陽城教諭卒所著有封水論渠道要略皆言甯夏水利爲署同知時所作云

唐象三字易初平定人己亥舉於鄉需次山左歷署蒲臺博山知縣濱川知州多惠政癸卯黃水漫溢民苦寒凍請於上官辦縣衣數千領以濟貧不足又自捐數百俸皆挾纊尋補陵縣與癸酉分校未幾卒於官

任用儀字鴻吉平定人丙午魁順天鄉試授龍里知縣值銅仁苗變練壯勇備軍械以資守禦費不給輒佐以廉俸署中至不能舉火量移麻哈州兼署清平定番州判又值南隴教匪滋擾州爲衝途軍書旁午旰食爲常卒皆轉危爲安宦遊萬里歷任五地所至皆刻苦撙節以濟公用清潔之操一時競稱之

張在田字鶴峯孟縣人領丙午鄉薦由大挑署安福知縣造渡船以濟行旅建城堡以衛民居甚有惠政以忤大吏論

將歸矣傳方伯鼎時爲臬司敬其慧直力請於大吏得復職
調任龍陽在官六年水旱五遇竭力拯濟人無流亡爲政務
先教化葺龍池書院與諸生講授優其月餼民以訟至者立
與判決咸服其平性甘淡泊而推解不吝故官妻子久滯者
必厚恤之

張蒲璧字季男平定人舉戊申鄉試授松滋知縣方需次時
崇陽蒲圻同時以徵糧激變大吏素知蒲璧才特委署崇陽
且令請兵辦理蒲璧止之單車至縣剴切曉諭民皆帖服及
卒松滋一以重農興學除暴安良爲務與甲子楚闢分校得
解首王德新故名士一時以風鑑推之著有宦遊日記志晉
林詩文集

任質淳字太素平定人壬子鄉試第一授藤縣知縣到官盡

裁陋規有折獄才民誦之唐登雲其同歲生也官於粵歷署長樂遷江以廉惠稱

以上平定州

郭令宣字輝臺忻州人領戊午鄉薦由臨汾教諭授壽甯知縣自以儒官膺民社懼不能勝於是益講求吏治事必躬親士民悅服歷署延平同知福甯知府引疾歸

馬騰蛟字象旂忻州人壬申進士入翰林改兵部主事歷吏部員外郎郎中擢貴東兵備道在官清正能舉其職以忤貴臣意鐫級尋乞養歸家居垂二十年卒

崔景會字宗堂忻州人庚午舉於鄉歷長子教諭太原府教授作七務五戒條約教士旋擢麟遊知縣蒞任後發奸摘伏明敏若神以性剛不合於大吏被議歸家居不交官府足不入城市年八十二卒

趙攀龍字騰雲忻州人壬午武舉累官至雷州都司忠勇性
成平臺灣剿博羅永安賊匪並有功效乾隆末伴選羅貢使入
都特蒙

賜袍優獎嘉慶中署欽州參將告歸卒

馬漢蛟字雲階忻州人戊子魁於鄉歷恩平長樂知縣署嘉
應知州理煩治劇廉幹有聲補陽江縣地濱海兼轄三司蒞
任六年政平人和嘗奉檄巡洋面不避艱險留心緝捕奸宄
斂迹遷建甯府同知告歸卒

李鑾宣字石農靜樂人庚戌進士授刑部主事遷員外郎分
校乙卯丙辰鄉會試嘉慶戊午擢浙江溫處兵備道詰盜恤
災禮士愛民遠近稱惠海寇蔡牽肆掠內洋相戒不犯溫境
劫商舟詢知爲溫人多釋去升雲南按察使以平反龍世恩

獄忤巡撫某被劾落職道戍新疆尋遭父憂踰年釋還服除
補戶部主事旋擢天津兵備道濬內河營田郡南得膏腴萬
餘畝粵民以罪徙津者假海船居停爲名設局淫博恣爲不
法訪得悉按誅之教匪事發景州鄉民被惑者懼誅謀鋌險
偵知卽嚴爲備而張示許其燬經自首免罪民心帖然調通
永道遷直隸按察使明年調廣東旋授四川布政使升雲南
巡撫

命方下以疾卒性伉直遇事求實治獄尤詳慎其所平反類
皆曲協輿情而頗以此忤時少受學於壽陽祁鶴皋博極羣
書最長於詩一時名宿多與訂交秦小峴侍郎尤亟稱之著
有堅白石齋集子謹度以蔭官至鶴峯州知州

以上
忻州

鄭王弼字亮臣五臺人乾隆丙辰進士補澤州府教授遷襄

縣知縣爲政簡要案無流牘上官察其能有巨案輒檄令判決遇歲旱蝗先發倉而後請當道嘉之以爲識大體通權變在官數年循聲大著民作歌頌之擢太倉知州未任而卒
馮鄴字時東代州人幼穎悟有幹濟才以戊午舉人選彭山知縣直金川用兵甫下車運軍米萬石事辦而民不擾上官廉其能擢署眉州會調滿兵自東川前進檄鄴駐犍江主驛傳鄴請於所司九站中皆增設一站令夫馬更番休息兵至劫期迅發不愆於素遷知秀山以勞瘁得疾卒

張濟世崢縣人辛未進士知新安縣除暴安良輿情允洽有製匾頌德者曰吾所爲者職所當爲者也安用此爲卻不受黃泌代州人丁丑進士歷武甯浮梁知縣進南昌同知卒於官泌品端行潔經術蘊含在武甯以茶榷病民嘗捐俸免稅

浮梁俗錮婢不嫁厝柩不葬必爲之厲禁陋習立除自少以文章盛名及爲吏雅思展施所學未久遽卒時論惜之

徐敬儒五臺人己卯舉於鄉由大挑補霸州州判累遷永定河南岸同知性剛直強毅才識通敏嘗任漕運通判甫三日而潞河決急募民夫堵合親立泥淖中指麾兩晝夜而決口塞賠累數千金不卹在南岸日驅馳河干於全河形勢及隄岸修守之法燎於心目數年無失事父憂歸服闋授九江府同知先是江西漕船北上屢以遲延獲咎至是派敬儒爲總運渡黃入北運河察河水足用而船行特緩密遣人於水底維探則船底暗懸大木故重墜不前敬儒大怒呼集旗丁水手嚴詰之叩頭服罪命斧斷竹索大木悉浮水面由是船行駛甚先期抵壩坐船泊張家灣患時疫渴熱夜半墜入水卒

張健崞縣人以己卯舉人筮仕粵西歷署名邑改知直隸藁城正定二縣遷灤州知州所至均以經術飾吏治循聲卓著士民德之著有耘皋遺集官餘適志草

任諱字西巖崞縣人舉庚辰鄉試授漳州府通判署南靖縣水溢入城諱乘舟出入設法疏濬閱七日而隄成眾免墊溺尋授龍巖州州同遭憂起爲光澤知縣值歲饑開倉賑濟並勸富室出粟平糶縣人稱之勒石銘德調知建陽丕興文教修紫陽書院及朱子墓未幾卒於官

劉溥元字善長五臺人乙丑進士任內鄉知縣決獄聽察如神居數月積案全結鄉有虎而冠者三人魚肉村民積年逋賦數千金前令隱忍代賠莫敢過問溥元訪得實夜率丁役二百人會營往捕獲其二縛送城中其一最凶悍役從衾中

縛之走其妻僕而升屋聲礮徒黨全集追奪溥元部勒丁役格鬪眾披靡乃押回通詳並誅之合縣稱快甲辰歲大荒出倉穀四萬石活其民慮干例駁先發後報上官嘉之浙川有殺人而凶手兩疑者檄溥元往鞠一訊而得正凶調署南陽除前令苛政數事滑縣地介直隸山東爲兩省逋逃藪又地廣賦繁吏胥因緣爲奸弊不可治兩司檄溥元往治不月要犯半弋獲逋賦亦清母憂歸卒

趙來震號震墅崞縣人辛卯進士筮仕四川會有軍務隨營辦理糧餉尋奉檄守忠州巡防嚴密賊莫敢犯復督兵追勦擒獲甚眾以功賞戴花翎擢天全州知州爲政有清直聲

卽嘉卿字孚吉代州人性倜儻讀書負才略以諸生循例授合州州同改知昭文縣遷雲南白鹽井提舉以老歸服官四

十餘年履州縣十九任所至有惠政在滇最久嘗捐俸設開
化堆站以重邊防借帑開甯臺銅廠以資鼓鑄大軍征緬供
頤夫馬無不先期籌備先後六載事集而民不困一時有能
吏稱去之曰遠近頌德石屏人祀之名宦十公祠勒石紀之
子若伊官至直隸按察使別有傳

以上
代州

劉鑑字湖山河曲人乾隆戊戌武進士授侍衛累遷南雄協
副將署高州鎮事粵西苗叛總督吉令帥所部往勦屢敗賊
進攻亞稿那地冊亨等處擒其渠魁數人事平請於制府在
八達地奏建城池以衛民居其功最著升南昌鎮總兵調狼
山鎮署江南提督廉潔敬慎遇將弁有信義出閱營伍供帳
悉除隨從數人而已

王鉞保德人領癸卯解額授資陽知縣多惠政縣人德之卒

於官菜石以志

以上保德州

葛朝陽安邑人舉丙辰鄉試宰浙之常山縣以德化人有兄弟構訟久不結情遭理論委曲引譬皆感泣求罷訟內擢戶部郎中論事有卓識不與眾浮沈同官咸推重之

弋照安邑人丁巳進士以知縣厯官江浙粵東所至有政聲與庚午浙闈分校得名宿周澧人服其精鑑宰三水縣見有女子五結帶投河怪之召父老問故曰若輩同盟真武祠願共死此俗向有之不足異也未幾又有九女投河如前照曰是祠不除較河伯娶婦爲害尤酷親往斧其像立毀祠宇時觀者數千人靡不慄慄照毅然不顧其風遂絕粵民嘖嘖稱之

荆如棠字蔭南平陸人戊辰進士由翰林院庶吉士授知縣

官至分巡淮揚兵備道宦績甚著民皆稱之

郭如阜夏縣人壬戌進士任江南太平知縣性孝友居官清謹邑被蛟漂沒多方撫賑不惜己財旋致仕

李汝棟字雪園夏縣人乙亥舉於鄉由大挑知吳江縣整飭漕政推第一上游倚重甲子三吳大水棟查災籌賑活民無算累官武昌知府著有海陵小草行世

王宿善安邑人壬午鄉薦歷知羅定州政聲甚著嘗署萬州有市船十餘遇颶風颶至文昌境爲邏卒所獲疑爲巨盜宿善奉檄詳詰實閩商也請釋之商感德獻千金辭弗受調佛岡同知值歲荒捐廉倡賑全活甚多

牛問仁安邑人癸未進士授商水知縣督修河隄水患賴以永息課士勸農隱治民心頌聲洋溢解組歸囊無餘貲子步

奎甲辰進士令新鄉亦有惠政

范三綱字敘五平陸人舉戊子鄉試第一戊戌成進士授刑部主事歷遷戶科給事中巡視南漕秉正嫉邪人皆憚之侯在容字涵亭解州人壬辰進士爲人端方正直宰行唐縣政尙簡易與民安於無事民咸樂之有政本陶唐之詠致仕歸

郭照黎芮城人領丁酉鄉薦知安平縣有政聲上官知其能鄰有重案多委決焉歷內邱邢臺擢知昌平州值水災捐廉賑恤保全甚眾遷平涼知府攝平涇兵備道遇事務持大體嘗於座右書火性一動好事亦乖八字以自箴其學識諳練如此

李騰蛟芮城人辛丑進士知任邱縣縣古鄭州也多澁有潤

爲田者爭墾種屢釀訟端騰蛟爲清丈得腴壤四百頃按則
升科官民均益調武清河流漲溢漫五百餘村驗災發賑躬
行泥淖中貧民均霑實惠巨盜李某久爲畿東患偵知所在
率丁壯乘夜掩捕擒之以能擢知遵化州積勞卒於官
馬浚雲字太冲解州舉人任安遠知縣厯署都昌萍鄉玉山
升九江府同知所至有政聲每去任百姓攀轅臥轍者至數
十里事繼母以孝聞後以父病究心岐黃捐資施藥訖宦達
不懈

黃茂字種之夏縣人領乙卯解首尋成進士入翰林改神木
知縣厯署府谷及葭州以慈惠稱公務之暇興學課士邊土
風氣爲之一變遇歲大祲竭力賑濟全活甚衆

王安安邑人官涿州知州調景州皆以廉能稱京畿大水安

時知霸州災黎徧野念帑賑不卽至急捐廉救濟妻故富家亦出金購縣衣數千分給貧民全活無算大府器之調通州旋遷北運河同知隨事盡職政聲懋著

王曾淑安邑人性至孝以貢知建平縣立卽川書院興利除弊民惠之及去立祠以祀再補望都捐廉濬河以護城邑迄今利賴

王玲字玉聲芮城人由廩生任連江知縣調莆田福安以病歸起補咸縣歷永年鋤豪猾雪冤獄輕徭薄賦所在有聲嘗奉檄治金川軍需咄嗟立辦民不知擾擢知茶陵州拯卹災黎州民立碑頌之

以上解州

陳夢月字象臣絳縣人戊辰進士授刑部主事歷禮部郎中擢甯紹台道到官革陋規察奸吏惠窮黎遇火工及大疑獄

皆應手立辨尤能於法外施仁浙人傳其折獄事至演爲劇
本轉糧儲道致仕歸囊橐蕭然諫子孫耕讀以終箸有榮錫
集

安受祺垣曲人乾隆辛未進士任金華知縣縣界東連義烏
多山盜賊出沒無常此縣捕急則遁入彼縣大爲民害受祺
設法緝治連破巨案閭里獲安

王捷掄字聯升絳縣人舉乙酉鄉試性耿介惴惴無華歷任
涿州遵化州州判樸素自持廉俸外不妄取一錢致仕歸清
直之稱士民交頌之

劉鵬字翔南聞喜人壬辰進士由朔平府教授擢知文縣縣
多番民嫁娶無行媒男女先野合偕歸女家三年後始娶鵬
禁革之白水河自階州入境中多水碓換行帖課無定額又

採買糧米縣派至五千石官吏皆視爲利藪民病之鵬請核減總督楊忠武公深褒嘉焉兼攝階州案牘連盡爲省釋所在民戴之職滿乞歸文縣人爲立祠祀焉家居教授以終甯廷偉聞喜人庚子武舉爲甯波都司營失火奮軀撲救膺重傷尋沒於官郡人感其德立祠祭之

潘世英字凍南聞喜人己酉舉於鄉令分水有循聲調署太平有富民誣誤成訟特原之富民獻酒爲壽曰公堂酌兕古意也小民各盡其心耳強以付主計弟世芳訝其重也啟之盡白錙怒曰先人望兄顯簠簋宜飭也況兄素以廉潔自助今賄何爲至哉世英始知餽非酒立集其人責以行賂而還之縣人大服充嘉慶戊寅同考官所取多越中名士乞養歸教授後進成就甚眾

以州

王居正字秀方蒲縣人乾隆乙未進士選庶吉士以編修與嘉慶甲子北闈分校大考罷歸迎

駕五臺授永壽知縣在官多惠政遭母憂縣人赴省願留大府以格於定例慰而遣之家居修輯縣志所著有鳳池雜記鹿樵山人公餘自記諸書

曹夢筆字如江蒲縣人由拔貢官兩淮鹽課大使時值大旱開渠引潮復請海運以濟民食勘災散賑不濫不遺以母老乞歸母沒廬墓服闋起雲南白石場大使卒

王懋功字九敘蒲縣人志行端潔薪甚文譽以歲貢司訓平順待士有禮愛才若渴貧不能卒讀者多割俸助之卒於官士民多爲之感泣

劉清秀字紫水隰州人由拔貢授阜城知縣廉介之操咸推

第一以上

梁景鸞靈石人由中書同知桂林府明察善斷時獠人有倡亂者奉檄查辦諭以禍福止誅首者數人餘皆帖服乞養歸家居多行義

霍州

右乾隆年一百六十五人

又五人附見